

Na osnovu člana 4.2 Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11) i člana 36. Poslovnika o radu Državne regulatorne komisije za električnu energiju ("Službeni glasnik BiH", broj 2/05), na sjednici Državne regulatorne komisije za električnu energiju održanoj 21. jula 2020. godine, donesena je

## **ODLUKA**

### **O ODOBRAVANJU PLANA INVESTICIJA ELEKTROPRIJENOSA BIH ZA 2020. GODINU**

1. Odobrava se Plan investicija Elektroprijenosa Bosne i Hercegovine a.d. Banja Luka za 2020. godinu (u daljnjem tekstu: Plan investicija).  
Vrijednost ukupno odobrenih ulaganja iznosi 173.996.693 KM.
2. Plan investicija sadrži strukturu i dinamiku realizacije planiranih investicija, sa izvorima finansiranja.  
Vrijednost pojedinačnih investicija i jedinične cijene opreme i radova nisu predmet razmatranja Državne regulatorne komisije za električnu energiju (DERK).
3. Plan investicija realizirat će se na transparentan način, prema procedurama reguliranim propisima o javnim nabavkama.
4. DERK će pratiti realizaciju Plana investicija, u skladu sa svojim ovlaštenjima.
5. Obavezuju se Elektroprijenos BiH i Nezavisni operator sistema u Bosni i Hercegovini da, u skladu sa definiranim procedurama, do 30. septembra 2020. godine dostave DERK-u na odobrenje Dugoročni plan razvoja prijenosne mreže koji će sadržavati sve komponente uključene u Plan investicija, kao i druge potrebe za razvoj sistema, uključujući rješavanje problema previsokih napona. U ovu svrhu neophodno je koristiti sve raspoložive studije, uključujući i rezultate Regionalne studije izvodljivosti za poboljšanje naponskih profila.
6. Dugoročni plan razvoja prijenosne mreže iz tačke 5. ove Odluke treba da detaljno elaborira opravdanost i neophodnost investicija koje se u Planu investicija vode kao ostale investicije (informacioni sistemi, telekomunikacije i poslovni objekti).
7. Obavezuje se Elektroprijenos BiH da do 30. septembra 2020. godine detaljno informira DERK o opravdanosti obima investicionog ulaganja na godišnjem nivou za investicije koje se u Planu investicija vode kao ostale investicije (informacioni sistemi, telekomunikacije i poslovni objekti).
8. Ova Odluka stupa na snagu danom donošenja i objavljuje se u "Službenom glasniku BiH", službenim glasilima entiteta i Brčko Distrikta BiH.

Broj: 05-28-16-213-5/20  
21. juli 2020. godine  
Tuzla

Predsjedavajući Komisije  
Nikola PEJIĆ